

ORANJESTAD – Dr. Jona Israel, profesor na Universidad di Aruba a forma parti di e ekipo cu a traha pa yega na e Erasmus Chapter, a hiba palabra dialuna mainta durante e conferencia di prensa den Europe House. El a pone enfasis riba importancia di programa di estudio y a gradici tur esunnan cu a haci' e bira un realidad.

“Henter Universidad di Aruba ta convenci cu inter nacionalisacion ta e caminda pa tuma,” asina e profesor asocia di ley internacional, comercial y di conseho, a bisa. Segun Israel, “esaki ta ofrece studiantenan un manera di haya balor adicional tanto den termino di experiencia personal como academico.” “Erasmus Chapter” (‘Erasmus’ (European Community Action Scheme for the Mobility of University Students) ta un programa Europeo cu tin como meta pa mehora calidad di enseñansa na universidadnan y pa fortifica nan dimension Europeo. E programa ta subsidia intercambio di estudiante y docentenan na institutonan di enseñansa superior na Union

Europeo.

Israel a splica cu Universidad di Aruba tin añanan trahando pa crea e posibilidad aki y asina cu el a keda cla, a move pa implementa esey di biaha. Na mei 2014 Universidad di Aruba a logra haya su acreditacion di NVAO y di biaha despues a solicita pa e Erasmus Chapter. A logra e Chapter y esaki a drenta na vigor dia 1 di januari 2015. Asina a cuminsa e proceso pa aplica pa becanan di Erasmus. Tur tres proposicion cu a wordo treci dilanti a wordo logra. Becanan pa estudiante y docentenan pa studia/intercambia den Union Europeo. Becanan pa estudiante studia/intercambia na Merca y na di tres luga financia cursonan di ley Europeo cu por wordo duna na Universidad di Aruba.

“Awo, un año despues di a wordo acredita, nos ta participando activamente den e programa Erasmus,” e profe-

Profesor dr. Jona Israel:

Erasmus Chapter ta duna balor personal y academico adicional na studiantenan di Aruba



sor a comenta. Actualmente tin dos estudiante Arubiano na Deggendorf Institute of Technology na Alemania pa un semester danki na e programa aki. “Mi kier gradici

tur hende na Universidad di Aruba cu a contribui na e logro grandi aki,” profesor Israel a finalisa bisando.

Acceso di Universidad di

Aruba na e programa di Erasmus ta un ehempel clave cu e dimension Europeo di Aruba y e maneho positivo cu Reino y Europa ta trece cun’e oportunidadnan grandi. □